

Na osnovu člana 7. stava 2. Zakona o budžetima u Federaciji Bosne i Hercegovine ("Službene novine Federacije BiH", broj 102/13,9/14,13/14,8/15,91/15,102/15,104/16,5/18, 11/19 i 99/19), člana 13. Zakona o principima lokalne samouprave u Federaciji Bosne i Hercegovine ("Službene novine Federacije BiH" br.49/06 i 51/09) i člana 38. tačka 4. Statuta općine Gornji Vakuf–Uskoplje ("Službeni glasnik općine Gornji Vakuf-Uskoplje", broj 1/01 i 3/05), Općinsko vijeće Gornji Vakuf-Uskoplje na svojoj __. redovnoj sjednici održanoj dana __.__.2021. godine, donijelo je

O D L U K U
O IZVRŠENJU BUDŽETA OPĆINE GORNJI VAKUF-USKOPLJE
ZA 2022. GODINU

I OPĆE ODREDBE

Član 1.

Ovom Odlukom se uređuje način izvršavanja budžeta općine Gornji Vakuf-Uskoplje za 2022. godinu (u daljem tekstu: budžet), upravljanje prihodima, primicima, rashodima i izdacima budžeta, te prava i obaveze korisnika budžetskih sredstava.

Član 2.

Budžet se sastoji od općeg i posebnog dijela.

Opći dio budžeta sastoji se od bilansa prihoda, primitaka, te bilansa rashoda i izdataka po vrstama i korisnicima.

Posebni dio budžeta sastoji se od plana prihoda i primitaka u kom se iskazuju porezni i neporezni prihodi, i drugi prihodi i primici općine te plana rashoda i izdataka razrađenih po vrstama i korisnicima za 2022.godinu.

II REVIZIJA I KONTROLA BUDŽETA

Član 3.

Reviziju budžeta vrši Ured za reviziju institucija u F BiH u skladu sa odredbama Zakona o reviziji institucija u Federacije BiH ("Službene novine Federacije BiH", broj 22/06).

III IZVRŠAVANJE BUDŽETA

Član 4.

Budžetom se osiguravaju sredstva budžetskim korisnicima (u daljem tekstu: korisnici) koji su u posebnom dijelu budžeta određeni kao nosioci sredstava na pojedinim pozicijama.

Korisnici budžetska sredstva mogu koristiti samo za namjene utvrđene u budžetu, na osnovu finansijskih planova, programa i aktivnosti za koja su sredstva i odobrena.

Korisnici budžeta su obavezni dostaviti finansijski i narativni izvještaj o namjenskom utrošku sredstava u roku od 60 (šezdeset) dana nakon utroška sredstava, a najkasnije do kraja budžetske godine.

Korisnici budžeta koji ne opravdaju korištenje sredstava u 2021. godini neće moći biti korisnici sredstava budžeta u narednoj budžetskoj 2021. godini. Sredstva raspoređena budžetom se mogu preraspoređivati između budžetskih korisnika, odnosno restrukturirati unutar budžetskog korisnika na temelju Odluke općinskog načelnika, a na prijedlog Službe za privredu i finansije, najviše do 10% ukupno odobrenih rashoda za budžetskog korisnika.

Član 5.

Budžet općine izvršava se na osnovu planirane dinamike realizacije programa i planova u skladu sa likvidnim mogućnostima budžeta općine.

Korisnici budžeta su dužni pri ugovaranju obaveza voditi računa o utvrđenoj dinamici priliva i odliva sredstava i uskladiti plaćanja sa planovima izvršavanja budžeta.

Član 6.

Služba za privredu i finansije vodi računa o likvidnosti budžeta i u slučaju potrebe realizira plaćanja prema sljedećim prioritetima:

1. otplata duga i kamata
2. plaće i naknade troškova zaposlenim
3. izdaci za materijal i usluge
4. tekući transferi (grantovi)
5. kapitalni izdaci
6. ostalo

U slučaju poremećene likvidnosti budžeta, Općinski načelnik na prijedlog Službe za privredu i finansije preduzima mjere za uravnoteženje budžeta i izmjene i dopune budžeta u skladu sa članom 36. i 37. Zakona o budžetima u Federacije BiH.

Član 7.

Postupak nabavke roba, usluga i radova vrši se u skladu sa Zakonom o javnim nabavkama Bosne i Hercegovine ("Službeni glasnik BiH", br.39/14) i Pravilnikom o postupku direktnog sporazuma ("Službeni glasnik BiH", br.90/14).

Član 8.

Sredstva na ekonomskom kodu – 600 000 - tekuće rezerve koristit će se za finansiranje hitnih i nepredviđenih izdataka koji se pojave u toku budžetske godine.

O korištenju sredstava tekuće rezerve budžeta odlučuje Općinski načelnik.

Općinski načelnik je obavezan izvještavati Općinsko vijeće o raspolaganju sredstvima tekuće rezerve budžeta u rokovima i na način propisan Zakonom o budžetu Federacije BiH.

Član 9.

Općina Gornji Vakuf-Uskoplje može se zadužiti u skladu sa članom 67. Zakona o budžetima u Federacije BiH.

Član 10.

Prikupljanje javnih prihoda općine obavlja se putem depozitnog računa općine Gornji Vakuf-Uskoplje, u skladu sa Pravilnikom o načinu uplate javnih prihoda budžeta i vanbudžetskih fondova na teritoriji Federacije BiH ("Službene novine Federacije BiH" br.33/16,89/16,9/17, 33/17,67/17,9/18,27/18,55/18,105/18,18/19,41/19,98/19 i 63/20), a platni promet se vrši putem više transakcijskih računa otvorenim kod ovlaštenih organizacija platnog prometa.

Član 11.

Plaće i naknade izabranim zvaničnicima, državnim službenicima i namještenicima Općine Gornji Vakuf-Uskoplje isplaćivat će se u skladu sa Zakonom o plaćama i naknadama u organima vlasti Federacije BiH (Službene novine Federacije BiH", br.45/10,111/12 i 20/17), Odlukom o plaćama i naknadama izabranim zvaničnicima, državnim službenicima i namještenicima u općinskoj upravi Gornji Vakuf-Uskoplje, Pravilnikom o plaćama i naknadama državnim službenicima i namještenicima u općinskoj upravi Gornji Vakuf-Uskoplje i drugim propisima koji regulišu ovu oblast.

Član 12.

Utvrđuje se osnovica za obračun plaće u iznosu od 330,00 KM i vrijednost boda od 1,00 koji će se primijenjivati pri obračunu plaće, a koji su utvrđeni pregovorom sa sindikatom uposlenika Općine Gornji Vakuf-Uskoplje.

Navedena osnovica primjenjivat će se za budžetsku 2022. godinu.

Član 13.

Sredstva utvrđena na poziciji naknade vijećnicima, naknade općinskoj izbornoj komisiji, naknade predsjednicima savjeta mjesnih zajednica i transferi političkim strankama isplaćuju se na osnovu Odluka Općinskog vijeća.

Sredstva za izdatke materijala i usluga isplaćuju se prema utvrđenim namjenama na osnovu validne finansijske dokumentacije, a u skladu sa zakonom.

Sredstva utvrđena na poziciji tekući izdaci - 614 000 - tekući transferi i drugi tekući rashodi, odobravaju se i isplaćuju na temelju Odluke Općinskog načelnika. Odlukom su utvrđuje namjena korištenja sredstava.

Član 14.

Odluke iz prethodnog člana imaju se objaviti u "Službenom glasniku općine Gornji Vakuf-Uskoplje" .

Član 15.

Sredstva u budžetu na ekonomskom kodu - 614 800 - ostali grantovi-povrat realizuju se na osnovu Odluka Općinskog načelnika o odobrenju povrata više ili pogrešno uplaćenih prihoda u budžet prethodnih godina, odnosno pogrešno ili više uplaćeni prihodi u budžet tekuće budžetske godine vraćaju se uplatiocima na teret prihoda tekuće budžetske godine na osnovu Odluke Općinskog načelnika.

Naknade za povrat po sudskim presudama, realizuju se na osnovu odobrenja Općinskog načelnika na osnovu pravomoćnih izvršnih sudskih odluka.

Član 16.

Sredstva u budžetu na ekonomskom kodu 820 000-kapitalni izdaci realizirat će se uz primjenu Zakona o javnim nabavkama, a na osnovu potpisanih Ugovora o nabavci stalnih sredstava, odnosno Ugovora o izvođenju radova i ovjerenih situacija od strane nadzornog organa.

Član 17.

Na sva pitanja koja nisu regulisana ovom Odlukom, a tiču se izvršavanja, računovodstva i revizije budžeta primjenjivat će se odredbe važećih zakona.

Član 18.

Ova Odluka stupa na snagu osmog dana od dana objavljivanja u "Službenom glasniku Općine Gornji Vakuf-Uskoplje", a primjenjivat će se na budžetsku 2022.godinu.

Broj:01-02.1-___/21
Gornji Vakuf-Uskoplje,
__._.2021. godine

Predsjednik
Općinskog vijeća
Goran Batinić, mag.nov.